

ՄԻՋՆԱԴԱՐՅԱՆ ՀԱՅԱՍՏԱՆԻ ՇԻՆԱՐԱՐԱԿԱՆ
ԳՈՐԾԻ ԿԱԶՄԱԿԵՐՊՄԱՆ ՄԻ ՔԱՆԻ ՀԱՐՑԵՐԸ
ԵՎ ՔԱՐԱԳՈՐԾ ՎԱՐՊԵՏՆԵՐԻ ՆՇԱՆԱԳՐԵՐԸ

ՍՏ. Խ. ՄՆԱՅԱԿԱՆՅԱՆ

Միջնադարյան Հայաստանում շինարարական գործի կազմակերպման եղանակների մասին շատ սակավ են մատենագրական տեղեկությունները և այս տեսակետից էլ առաջնակարգ հետաքրքրություն են ներկայացնում քարագործ վարպետների նշանագրերը, որոնք հանդիպում են և՛ Հունաստանում¹, և՛ Պարսկաստանում², և՛ Սիրիայում³, և՛ Վրաստանում⁴: Հայաստանում նշանագրեր հանդիպում են արդեն հելլենիստական շրջանի կառուցվածքներում: Փառնիի հեթանոսական տաճարի քարերի վրա հանդիպող նշանագրերը պատկերված են հունական այբուբենի տառերի ձևերով: Նշանագրեր կան նաև հետագա շրջանների հուշարձաններում (IV—V դարեր), սակայն նրանց թիվը հատկապես բազմանում է VI—VII դարերում, ընդ որում նրանց ձևերի մեջ նկատվում է որոշակի միասնություն: IX—XI դարերին պատկանող հուշարձանների վրա նշանագրերի բնույթը որոշ չափով փոխվում է, իսկ քանակը՝ նվազում: Սակայն պետք է նշել, որ այստեղ ևս հանդիպում են որոշ նշանագրեր, որոնք հայտնի են VI—VII դարերում: Դրանց ուսումնասիրությանը հատկապես անդրադարձել է Թորոս Թորամանյանը, որը մի առանձին հոդված է նվիրել Զվարթնոցի նշանագրերին: Նա գրում է, որ Վոգյուեի և Դիոլաֆուայի բերած նյութերի հիման վրա կարելի է հանգել հետևյալ եզրակացության:

«Ի հնումն, շենքի ճարտարապետները քարտաշների վերաբերյալ գործերը զանազան մասերի բաժանելով յուրաքանչյուր մասը հանձնում էին առանձին կարող վարպետների, որոնց պարտականությունն էր նույն այդ մասի պատը շինելը և թե քարերը տաշելով տեղը շարելը. այս միջոցին յուրաքանչյուր վարպետ իր շինած պատի վրա տաշած քարերի նշանները փորագրելուց հետո շարում էր պատի մեջ: Գործն ամբողջացնելուց հետո չափում էին նրանց նշաններով տաշված քարերը և ըստ այն տալիս էին ընդհանուր աշխատավարձը»⁵: Ըստ Թորամանյանի, աշխատանքի կազմակերպման այս նույն ձևն էլ ընդունված է եղել Հայաստանում:

¹ О. Шуазу, История архитектуры, т. I, Москва, 1937, էջ 148:

² Vogie M., La Syrie Centrale, t. I, Paris, 1865—1877, էջ 63:

³ Dieulafoy M., L'Art Antique de la Perse, t. I, Paris, 1885, էջ 11:

⁴ Г. Н. Чубинашвили, Памятники типа Джвари, Тбилиси, 1948, էջ 65:

⁵ Թ. Թորամանյան, Զվարթնոց եկեղեցու քարերի նշանները, Տեղեկագիր ՀնՄՀ Գի-տություն և արվեստի ինստիտուտի, № 2, Երևան, 1927, էջ 3:

Թորամանյանը սակայն շատ ավելի առաջ է գնում և նույնիսկ հնարավոր համարում այդ նշանների հիման վրա որոշել տաճարի շուրջը թափված բազմաթիվ քարերի սկզբնական տեղերը: Նա հիշատակում է, որ Զվարթնոցում «...պատերից անշատված և կուտակված քարերի վրա եղած նշանները մասնագիտորեն քննելով ամենեկին դժվար չէ որոշել, թե շենքի որ մասերին էին պատկանում նույն քարերը: Զվարթնոցի ավերակներն այցելողները, եթե հետաքրքրվեն աչքով նայեն, ամեն քայլափոխում կտեսնեն քարի վրա խազված նշանները, բայց միայն մասնագետին հասկանալի է, թե որ մասին են պատկանում սույն քարերը»¹:

Ինչպես կտեսնենք ստորև, Թորամանյանի այստեղ բերված տեսակետներից և ոչ մեկը չի հաստատվում փաստական նյութերով և նրա դրույթները նշանագրերի մասին կարոտ են հիմնական վերանայման: Վարպետների նշանագրերին անդրադառնում են նաև մի շարք այլ հեղինակներ: Այն ժամանակ, երբ Բ. Առաքելյանը² և Վ. Հարությունյանը³ հիմնականում բաժանում են Ն. Սառի տեսակետը արհեստավորական ցեխերի (ըստ Բ. Առաքելյանի — խմբերի) գոյության մասին, Կ. Ղաֆազարյանը⁴ և Վ. Աբրահամյանը⁵ լիովին հետևում են Թորամանյանին:

Այս կապակցությամբ որոշակի հետաքրքրություն է ներկայացնում Գրիգոր Նյուսացու (IV դարի վերջ) նամակը ուղղված Բկոնիալի եպիսկոպոսին, որտեղ նա անդրադառնալով շինարարական աշխատանքների կազմակերպման ձևերին, պահանջում է, որ աշխատողների հետ կնքած պայմանագրում հատկապես նշվեն աշխատանքային օրվա նորմաները, որովհետև ինչպես նա է գրում, բանվորները «...միայն ժամանակ կանցկացնեն և առանց ցույց տալու իրենց օրվա արտադրանքը, կպահանջեն իրենց աշխատավարձը»⁶: Թվում է, թե այս հարցում իրավացի է Ա. Յակոբսոնը, որը գրում է. «...այս վկայությունը թեև վերաբերում է IV դարի վերջի Փոքր Ասիային, սակայն հարևան Հայաստանում էս, որտեղ սոցիալական և տնտեսական իրադրությունը հավանաբար քիչ բանով էր տարբերվում, դժվար թե գերիշխեր շինարարական աշխատանքների կազմակերպման մի այլ ձև, քան վերը նշվածը: Հայ քարտաշ վարպետների նշանները անուղղակի կերպով հենց այդ են հաստատում»⁷:

* * *

V—VII դարերի հայկական ճարտարապետության ուսումնասիրությունը ցույց է տալիս, որ չնայած հատկազգային և ծավալային կոմպոզիցիաների մեջ նկատվող բազմապիսի ձևերին, այդ շրջանի հուշարձանները աչքի են ընկնում իրենց ռճական միասնականությամբ, ընդ որում համանման կառուցվածքներում անժխտելի է համաչափությունների մի որոշակի սիստեմի կիրա-

¹ Թ. Թորամանյան, Նշմ. աշխ., էջ 6:

² Բ. Առաքելյան, Հայկական պատկերաքանդակները IV—VII դարերում, Երևան, 1951, էջ 74:

³ В. Арутюнян, По поводу датировки храма в Аруче, Ереван, 1946, էջ 29:

⁴ Կ. Ղաֆազարյան, Դվին քաղաքը և նրա պեղումները, Երևան, 1952, էջ 101:

⁵ Վ. Աբրահամյան, Արհեստները Հայաստանում, Երևան, 1956, էջ 225:

⁶ «Творения Григория Нисского», Москва, 1871, էջ 539:

⁷ А. Л. Якобсон, Очерк истории армянского зодчества IV—XVI веков, Москва, 1951, էջ 12:

ուումը: Կուլտային կառուցվածքների տեղաբաշխման և նրանց ձևերի հարցը միշտ էլ եղել է հայկական եկեղեցու ուղադրության առարկան և նրանց նկատմամբ ունեցած վերահսկողության մասին տեղեկություններ ունենք արդեն ամենավաղ շրջանից: Այսպես, մեր մատենագրության մեջ հանդիպող «Սրբոց հարց հետևողաց» կանոններում այդ մասին կարդում ենք հետևյալը (կանոն 25).

«Եկեղեցու հիմքը ծրագրելու իրավունքը պատկանում է եպիսկոպոսին, կամ արքեպիսկոպոսին և կամ եպիսկոպոսի հրամանով պերետուտին, եթե հակառակ այս կարգի դնան, հիմքը պիտի քանդել և թույլ չտալ եկեղեցի շինել»¹: Հայկական եկեղեցու կողմից կուլտային շինարարության նկատմամբ ունեցած վերահսկողության մասին որոշակի տեղեկություններ են պահպանվել արդեն քրիստոնեության տարածման առաջին դարերից: Այսպես, Աշտիշատի ժողովի (365) ընդունած որոշումներից պարզ է դառնում, որ եկեղեցին ծավալել էր ղզալի շինարարական գործունեություն, երկրի բազմաթիվ մասերում հիմնելով որբանոցներ, հյուրանոցներ և կատարելով հատկապես վանական կառուցումներ: Կասկած չի կարող լինել, որ այս ամբողջ շինարարությունն ընթանում էր եկեղեցու անմիջական վերահսկողության տակ: Տաճարաշինարարության նկատմամբ ունեցած վերահսկողության հարցը քննության առարկա է դառնում Շահապիվանի ժողովում (447), որտեղ ընդունված կանոններից ժե կանոնը հատկապես վերաբերում է այդ հարցին. այնտեղ կարդում ենք հետևյալը.

«Եթե ոք զնշխարհս մարտիրոսի կամի դնել, առանց եպիսկոպոսի աշխարհին մի դիցէ, վշիշատակ մարտիրոսաց և զժողովս առանց եպիսկոպոսի հրամանի մի ոք իշխեսցէ առնել: Եւ եթէ ոք ի սուրբ տեղեաց մարտիրոս բերցէ, առ եպիսկոպոսն աարցէ վկայութեամբ և թղթով եպիսկոպոսացն, ուստի երբն և իւրեանց եպիսկոպոսին հրամանաւ դիցէ՝ ուր արժան է դնել: Եթէ ոք սեղան կամիցի կանգնել տէրունական խորհրդին, առանց եպիսկոպոսին մի ոք իշխեսցէ»²:

Որ այս հարցը իսկապես էական նշանակություն ուներ եկեղեցու համար, ցույց է տալիս այն հանդամանքը, որ նրան անդրադառնում են նաև Պարտավի ժողովում (771)³, և այն իր որոշակի տեղն է դնում Մխիթար Գոշի Դատաստանագրքում⁴:

Այս բոլորից հետո կարելի է եզրակացնել, որ միջնադարյան Հայաստանում, ամենայն հավանականությամբ, գոյություն է ունեցել կուլտային կառուցվածքների շինարարության վերահսկողության ինստիտուտ և հանձինս դավառական եպիսկոպոսներին անմիջապես ենթակա ճարտարապետների, հայ եկեղեցին դարեր շարունակ ղեկավարել և ուղղություն է տվել եկեղեցական շինարարությանը:

Անցնենք այժմ բուն շինարարական աշխատանքների կազմակերպման հարցերին: Շինարարական աշխատանքների կազմակերպման մասին դժբախտաբար շատ սակավաթիվ հիշատակությունների ենք հանդիպում մեր մատեն-

¹ Ն. Մելիք-Թանգյան, Հայոց եկեղեցական իրավունքը, Շուշի, 1903, էջ 463:

² Ա. Ղլունյ սն, Կանոնադիրք հայոց, Թիֆլիս, 1914, էջ 78:

³ Նույ, տեղում, էջ 167:

⁴ Վ. Բատումյանց, Մխիթարյան Գոշի Դատաստանագիրք հայոց, Վաղարշապատ, 1880, էջ 142:

նազրույթյան մեջ: Նկարագրելով Շամիրամի շինարարական գործունեությունը, Մովսես Խորենացին գրում է, որ նա «...հրաման տալ չորից բիրոց և երկուց հազարաց արանց անարուեստից գործաւորաց յԱսորեստանետեց և յայլոց իշխեցելոց, և վեց հազար իւրոց ընտրելոց յամենայն արուեստաւոր գործաւորաց փայտի և քարի, սղնձոյ և երկաթոյ, որք ամենեւին կատարեալք իցեն յարուեստագիտութեան, ածել անխափան ի փափագեալ տեղին»¹:

Մեզ համար աշատեղ առավել ուշագրաւն այն է, որ նկարագրելով այդ կառուցվածքները, Խորենացին շինարարական աշխատանքների կազմակերպման մասին խոսելիս օգտագործում է իր ժամանակաշրջանում գործածվող տերմինները—«անարուեստ գործաւորաց» և «արուեստաւոր գործաւորաց», այլ խոսքով ասած «սեւագործ» բանվորներ՝ և որակյալ վարպետներ: Ոչ պակաս հետաքրքրություն է ներկայացնում նաև բուն աշխատանքի կազմակերպման ձևերի նկարագրությունը, ըստ որի՝ Շամիրամը «...հրամայէ զամբոխն ի բազում դասս որոշել, և ի վերայ իւրաքանչիւրոց դասուց զընտիրս ի ճարտարացն վարդապետս կարգել»²—աշխատանքի կազմակերպման մի ձև, որն անշուշտ կար և Խորենացու ժամանակ, ու պահպանվելով տասնյակ դարերի ընթացքում, հասել է մինչև մեր օրերը: Հետաքրքիր է նաև այն հանգամանքը, որ մեկ վարպետին համապատասխանում էր յոթ «անարուեստ գործաւոր»—մի հարարերություն, որը միանգամայն նորմալ է այնպիսի շինարարության ժամանակ, երբ ամեն ինչ կատարվում էր ձեռքով: Ուշագրաւ է, որ այս «անարուեստ գործաւորները» ևս բաժանված էին ըստ իրենց աշխատանքի բնույթի: Այս մասին է վկայում Մովսես Կաղանկատվացու մի հիշատակությունը, որտեղ կարդում ենք հետևյալը. «...և տրտնջեալ առն միոյ ի քարակրացն»³:

Շինարարական գործի կազմակերպման մասին որոշ տեղեկություններ հաղորդում են նաև մյուս հայ պատմիչները: Այսպես, Սերեոսը անդրադառնալով Դավիթում Սմբատի շինարարական գործունեությանը, գրում է հետևյալը.

«Ապո սկսան արկանել հիմն եկեղեցւոյն. ժողովետց ճարտարապետս քարի և կացոյց ի վերայ նոցա հաւատարիմ գործակալս, և հրաման ետ փութանակի հասուցանել ի կատարումն»⁴:

Մովսես Կաղանկատվացին, նկարագրելով Գրիգոր Պարթևին վերագրվող շինարարությունը Ամարասում՝ գրում է, որ նա «...արկանէր հիմն եկեղեցւոյ ի գիւղաքաղաքին Ամարասայ և կացուցաներ գործունեայս և հրամանատարս շինել եկեղեցին»⁵: Մի այլ տեղ նա հիշատակում է, որ «...ահ մեծ յայնժամ արկանէր ի վերայ գործունէիցն և գործակալաց. և փութապէս երկիւղիւ գործէին զշինուած սուրբ եկեղեցւոյն»⁶:

Թովմա Արծրունին նշում է, որ Գագիկ թագավորը «...տալ զմթերս գանձուց ի ձեռս գործաւորաց և արուեստաւորաց՝ պարսպաւորել ամրութեամբ զբլուրս գագաթնաւորս և դանաոիկ ամրոցս բերդից ի գաւառս և ի միջոցս երկրի...»⁷:

¹ Մովսես Խորենացի, Պատմութիւն Հայոց, Տիֆլիս, 1913, էջ 53:

² Նույն տեղում, էջ 53:

³ Մովսես Կաղանկատվացի, Պատմութիւն Աղուանից աշխարհի, Թիֆլիս, 1917, էջ 89:

⁴ «Սերեոսի եպիսկոպոսի պատմութիւն», Երևան, 1939, էջ 65:

⁵ Մովսես Կաղանկատվացի, նշվ. աշխ., էջ 45:

⁶ Նույն տեղում, էջ 89:

⁷ Թովմա վարդապետ Արծրունի, Պատմութիւն տանն Արծրունեաց, Թիֆլիս, 1917, էջ 475:

Այս տվյալներից կարելի է եզրակացնել, որ շինարարությունն առհասարակ կատարվում էր գործակալների միջոցով, որոնք նշանակվում էին կոտիտորի կողմից և ստանալով նյութական անհրաժեշտ միջոցներ, հավաքագրում էին տարրեր մասնագիտության վարպետների և սկսում աշխատանքը: Կառուցվածքների բարձր որակը, նրանց ոճական միասնականությունը, համաշափուկությունների մտածված օգտագործումը, վկայում են միաժամանակ, որ հուշարձանները կառուցվել են բազմամյա փորձ ունեցող բարձրորակ վարպետների կողմից, որոնք մի կառուցվածքն ավարտելուց հետո ոչ թե ցրվել են, հեռացել, այլ նույն այդ հիմնական խմբով սկսել մի այլ շինարարություն: Այս հիմնական խմբի ղեկավարը, ինչպես ցույց են տալիս բոլոր տվյալները, եղել է ճարտարապետը, որի աշխատանքը լիովին անջատված է մյուս վարպետների աշխատանքից:

Բացի հուշարձանի առանձին մասերի նշվարկումից և շինարարական աշխատանքների անմիջական վերահսկումից, ճարտարապետն էր, որ պետք է տար բոլոր կարևոր հանգույցների մոդելները և նրա ցուցմունքներով էր, որ առանձին որակյալ վարպետները պետք է պատրաստեին սովորական ձևերից շեղվող քարերի ձևանմուշները: Որ հատկապես ճարտարապետն էր ղեկավարում, ուղղություն տալիս մնացած բոլոր վարպետների գործունեությանը, սլաքով է գտնում նաև Թովմա Արծրունու մի հիշատակությունից, որտեղ նա գրում է.

«Եւ քանզի էին ի դրան արքունի գումարեալք արուեստաւորք բազումք, արք պատուաւորք ժողովեալք յամենայն ազգաց յերկրէ, որք ոչ վրիպէին առնել զոր խորհէր արքայ, այլ ըստ հրամանին վաղվաղակի և գործն առնոյր զկատարումն՝ ումեն ի նոցանէ ճարտարապետի առն իմաստնոյ և հանձարեղի հրամայէ թագաւորն շինել տաճար մի քառանկին...»¹:

Ճարտարապետի հիմնական գործիքներն էին լարը, քանոնը, կարկինը: Հենց այդ մասին է վկայում Թովմա Արծրունու հետևյալ հիշատակությունը.

«Յայնժամ և իւր իսկ արքայի ամենիմաստ հասողութեամբն հանդերձ բազում արուեստաւորք զլար ճարտարութեան ի ձեռն առեալ գծել, միանգամայն և չծաղրել նշանակել առ ստորոտով լերինն, որ է գագաթն կղզոյն, զտեղիս զրօսացուցանողս վայելչաւորս, ըստ արժանի կայենից արքայական...»²:

Այս ամենից հետո ղեկավար չէ կոահել, որ ճարտարապետի աշխատանքն անջատված էր մյուս վարպետների աշխատանքից, և նա իրականացնում էր միայն բնդհանուր ղեկավարությունը: Բացառված չէ միաժամանակ, որ առանձին ղեկավարում որպես գործողակալներ հանդես էին գալիս հենց իրենք՝ ճարտարապետները: Այդպիսի եզրակացության հնարավոր է գալ Ստեփանոս Օրբելյանի մի հիշատակության հիման վրա, որը վերաբերում է Գնդեվանքի (936) շինարարությանը: Նա գրում է, որ տաճարի կոտիտորը, իշխանուհի Սուփիան «...կացուցեալ ի վերայ վանաց երէցն զհայր Սարգիս և գործակալ զնղիշա երէց և նկարիչ»³:

¹ Թովմա Արծրունի, նշվ. աշխ., էջ 481:

² Նույն տեղում, էջ 480: Կառուցվածքի նշվարկումը լարի միջոցով հիշատակվում է արդեն V դարի մատենագրության մեջ, ինչպես այդ տեքստում ենք Աղաթանգեղոսի մոտ, Հոփիսիմեի վկայարանի շինարարության նկարագրության ժամանակ:

³ Պատմությունն հանդիսանում է Սիսական արարեալ Ստեփանոսի Օրբելյան արքեպիսկոպոսի Սխանաց, Թիֆլիս, 1911, էջ 260:

Ուսումնասիրությունը ցույց է տալիս, որ ճարտարապետի և այն վարպետների միջև, որոնք անմիջականորեն աշխատում էին շինարարության վրա, կար մի աստիճան ևս. դրանք վարպետների առանձին խմբերի ղեկավարներն էին. որոնց միջոցով ճարտարապետը իրագործում էր իր մտահղացումները: Դեռևս Խորենացին հիշատակում էր, որ շինարարության վրա աշխատողները բաժանվում էին առանձին «գասերի» և որպես նրանց ղեկավարներ հանդես էին գալիս «զրնտիրս ի ճարտարացն վարդապետս...»: Բացի դրանցից, գործակալություններ նաև իր անմիջական օգնականները:

Իսկ թե ինչպես էին կոչվում այս կարգի աշխատողները, պարզ է դառնում Թովմա Արծրունու մի հիշատակությունից, ըստ որի տաճարի կառուցման ժամանակ ծախսված երկաթի քանակը նրան հաղորդել է «հաւատարիմ ոստիկան մի ի գործավարաց քաղաքին»¹:

Շատ սակավաթիվ տեղեկություններ են պահպանվել նաև աշխատավարձի վճարման ձևերի մասին: Մխիթար Գոշր. խոսելով արհեստավորների աշխատանքի մասին՝ գրում է հետևյալը.

«Արուեստաւորք ամենայն ըստ որում եւ իցեն արուեստի եթէ հատուածով գործիցեն եւ եթէ վարձով, յորժամ ոչ ըստ հաճոյից տւառն գործիցեն, այլ եւ զնիւթն ապականիցեն, դատաստանաւ է ըստ հաճոյից նոցա առնել զարձեալ, կամ զապականեալն ի գնոյն ըստ արժանւոյն լնուլ եւ ապա լիով հասանել վարձու»²:

Դրա հետ միասին չպետք է աչքաթող անել նաև այն հանգամանքը, որ միջնադարյան Հայաստանում լայն տարածում ունեն հասարակական մասշտաբի հարկադիր և անվճար աշխատանքը, որն արտահայտելու համար մատենագրության մեջ գործածվում են մի շարք տերմիններ, ինչպիսիք են «կոռ», «մարդահարկ», «բեկար», իսկ ավելի հնում՝ «խաշար»:

Հիշատակելով արարական Եզիտ ոստիկանի շինարարական զործունեությունը Կարինում, Ղևոնդը գրում է.

«Իսկ ի դալ միւսոյ ամին կազմեալ Եզիտն զօրսն որ բնդ ձեռամբ իւրով երթալոյ հասանէր ի քաղաքն Կարնոյ և արկանէր մարդահարկ ի վերայ աշխարհին. և հաւաքեալ զլրագմութիւն անթիւ՝ կացուցանէր գործավարս ի վերայ գործոյն, և փոյթ յանձին կալեալ շինէր զխրամատեալ պարիսպ քաղաքին»³:

Համանման հիշատակությունների հանդիպում ենք նաև մյուս պատմիչների մոտ:

Ս. Հակոբյանը, քննարկելով միջնադարյան Հայաստանում եղած հարկերի հարցը, գրում է, որ բեկարը «...այն հարկադիր և ձրի աշխատանքն էր, որ անմիջական նյութական բարիքներ արտադրողներն իրենց սեփական աշխատանքով, աշխատամիջոցներով և քաշող ուժով կատարում էին բերդերի, ամրոցապատների, ճանապարհների, կամուրջների շինարարության վրա...»⁴:

Դժվար չէ եզրակացնել, որ հենց այսպիսի հարկադիր ու ձրի աշխատանքի միջոցով էին կատարվում և՛ հողային աշխատանքները, և՛ շաղախի պատրաստման հետ կապված գործերը, և՛ հատկապես փոխադրական բոլոր աշխատանքները, որոնք առանձնապես մեծ դժվարություն էին ներկայացնում,

¹ Թովմա Արծրունի, նշվ. աշխ., էջ 482:

² Վ. Բաստումյանց, նշվ. աշխ., էջ 436:

³ «Պատմութիւն Ղևոնդեայ մեծի վարդապետի հայոց», Ս. Պետերբուրգ, 1887, էջ 129:

⁴ Ս. Հակոբյան, Հայ գյուղացիության պատմություն, Երևան, 1957, էջ 326:

Լթե ի նկատի ունենանք, որ այն ժամանակ համարյա ամեն ինչ կատարվում էր ձեռքի ուժով:

Միայն հարկադիր աշխատանքի միջոցով էր հնարավոր լինում տաճարների վրա բարձրացնել այն հսկայածավալ քարերը, որոնց առկայությունը գետնից 15—20 մետր բարձրության վրա, այսօր էլ այցելուի զարմանքն է առաջացնում:

Բերված հիշատակությունների հիման վրա պարզ են դառնում շինարարական աշխատանքների ղեկավարման բոլոր ստորաբաժանումները:

Ստացվում է հետևյալ պատկերը: Ամենից վեր կանգնած է գործակալը, որը նշանակվում է կոնստրուկտորի կողմից, ստանում համապատասխան միջոցներ և շինարարությունն ապահովում շինանյութերով: Նրան անմիջականորեն ենթարկվում են ուստիկանները, որոնք հետևում են շինարարական աշխատանքների ընթացքին և կատարում աշխատանքի հաշվառումը: Շինարարական աշխատանքները ղեկավարում է ճարտարապետը (փոքր կառուցվածքներում՝ զլխավոր վարպետը): Վարպետներն ըստ իրենց մասնագիտության բաժանված էին համապատասխան դասերի, որոնց ղեկավարները նշանակվում էին առավել որակյալ վարպետներից:

Սովորական քարտաշների աշխատանքից անջատվում էր նաև քանդակագործների աշխատանքը: Այնպիսի գործեր, ինչպիսիք են Զվարթնոցի արծվախոյակները և տաճարը շրջանցող խաղողի և նույն ֆրիզը, անշուշտ սովորական քարտաշ վարպետների գործեր չէին և կարող էին ստեղծվել միայն որակյալ քանդակագործների աշխատանքով: Այսպես, օրինակ, Զվարթնոցի խաղողի և նույն հայտնի բարձրաքանդակներից և ոչ մեկը չի կրկնված նույնությամբ, ընդ որում որոշակի կերպով նկատվում է այն ավատ մոտեցումը, որն ունեցել է վարպետը այդ կոմպոզիցիան ընտրելիս: Կասկած չի մնում, որ հարթ սալի վրա նախօրոք ուղղակի նկարվել է ապագա բարձրաքանդակի ուրվագիծը և հետո, այդ ազատ կատարված նկարի հիման վրա, քանդակվել: Պարզ է, որ այդպիսի բարձրարվեստ գործերի հեղինակները սովորական քարտաշների չէին, և նրանց աշխատանքն անջատված էր շինարարության մյուս քարտաշների աշխատանքից:

Բայց բուն շինարարական աշխատանքի կազմակերպման պրոցեսը մնում է չպարզաբանված: Ահա այստեղ է, որ մեզ օգնում են հուշարձանների վրա պահպանված նշանագրերը, որոնք գեթ մասամբ հնարավորություն են տալիս մոտենալ այս՝ մինչև այժմ չլուսաբանված հարցին:

Նշանագրերը ներկայացնում են 8—12 սմ. բարձրություն և 2—5 մմ. խորություն ունեցող գծվածքներ և սովորաբար փորագրված են քարի ճակատային կողմում, մեծ մասամբ նրա կենտրոնական մասում: Բացառություն են կազմում կարկինով արված նշանագրերը, որոնք հաճախ ունենում են զգալի չափեր: Որպես օրենք՝ մի քարի վրա արվում է մի նշանագիր, թեև առանձին, շատ հազվագյուտ դեպքերում նկատվում է երկու նշանագրի առկայություն միևնույն քարի վրա:

Նույնատիպ նշանագրեր հանդիպում են միանգամայն տարբեր կոնստրուկտիվ նշանակություն ունեցող քարերի վրա, և այս տեսակետից բնավ

¹ Բ. Առաքելյան, Հայկական պատկերաբանականները IV—VII դարերում, Երևան, 1949, էջ 96:

հնարավոր չէ որևէ օրինաչափություն նկատել, թեև որոշ տեղերում կարելի է տեսնել միմյանցից ոչ հեռու, սովորաբար նույն կոնֆիգուրացիան ունեցող քարերի ոչ մեծ խմբեր (5—6 հատ), որոնք բոլորն էլ ունեն նույն նշանագիրը:

Այն հանդամանքը, որ նույնատիպ նշաններ հանդիպում են կառուցվածքի միմյանցից զգալի հեռավորության վրա գտնվող մասերում և, որ գլխավորն է, համարյա թե միևնույն բարձրության վրա, հիմնավորապես ժխտում է թորամանյանի դրույթը՝ կառուցվածքը իբր տարբեր մասերի բաժանված լինելու և յուրաքանչյուր մասը մի վարպետի հանձնված լինելու մասին:

Յոթերորդ դարի բազմաթիվ հուշարձանների վրա հանդիպող նշանագրերի համեմատական ուսումնասիրությունը ցույց է տալիս, որ նրանց դասավորության մեջ բնավ հնարավոր չէ մի որևէ օրինաչափություն նկատել: Կարելի է բերել տասնյակ օրինակներ, թե ինչպես պատի նույն շաբբի մեջ մի տիպի նշանագրին կից հանդիպում է բոլորովին այլ տիպի նշանագիր, իսկ այդ երկուսն էլ, իրենց հերթին, շրջապատված են լինում առհասարակ նշանագրեր շունեցող քարերով: Բացի այդ, հաճախ կարելի է տեսնել, ինչպես այդ նշանագրերը կրկնվում են այս անգամ արդեն միմյանցից շատ հեռու դասավորված տեղերում, հուշարձանի տարբեր անկյուններում, միանգամայն տարբեր կոնստրուկցիաների քարերի վրա:

Մինչդեռ եթե բնդունենք թորամանյանի դրույթը՝ կառուցվածքը առանձին մասերի բաժանված լինելու մասին, ապա նշանագրերի դասավորության մեջ ևս պետք է նկատվեր մի որոշակի օրինաչափություն և որպես օրենք, միմյանց կողքի պետք է որ դասավորված լինեին միայն և միայն համանման նշանագրեր, մի բան, որը չի նկատվում և ոչ մի հուշարձանի վրա: Ճիշտ է, կան տուսնձին դեպքեր, երբ համանման կոնստրուկտիվ էլեմենտների որոշ քարեր, որոնք տաշվել են միևնույն օրինակի համաձայն և միևնույն շափերն ունեն, կրում են միևնույն նշանագիրը, սակայն պետք է ասել, որ այս դեպքերում էլ համանման նշանագրեր ունեցող և միմյանց մոտ դասավորված քարերի քանակությունը չի անցնում 5—6 հատից և նրանց կողքին անհամեմատ ավելի շատ են արդեն այնպիսի քարեր, որոնք առհասարակ դուրկ են նշանագրերից:

Իր դրույթները հիմնավորելու համար որպես հիմնական կռվան թորամանյանն առաջ է քաշում Զվարթնոցի մույթների գոգավոր խորշերի աստղանիշ նշանագրեր ունեցող քարերի օրինակը և գրում է հետևյալը.

«Հինգ թևով աստղ նշան ունեցող վարպետը ճարտար և հմուտ եղած է կոր և գոգավոր քարեր տաշելու և շարելու մեջ, որին հանձնվել է բացառապես չորս գմբեթակիր մեծ մույթների հետևի կիսարոտրակ խորշերի և տաճարի արտաքին պատերի ներքին երեսների բոլոր (ընդգծումը մերն է—Ս. Մ.) կոր և գոգավոր քարերը տաշել և իրենց տեղը շարել, նմանապես սվաստիկա նշան ունեցող վարպետը տաշել և շարել է տաճարի ներսի երեսի վրա եղող որմնասյուներն իրենց խարիսխ և խոյակներով»:

Եվ իրոք, երբ դիտում ենք նշված խորշերը, ապա դժվար չէ նկատել, որ նրանցից յուրաքանչյուրի վրա իսկապես կան 5—6 աստղաձև նշանագրեր ունեցող քարեր, որոնք որոշ տեղերում դասավորված են միմյանց մոտ, իսկ որոշ տեղերում՝ մեջընդմեջ, նշանագրեր չունեցող քարերի հետ միասին: Եթե հետևվենք թորամանյանի դրույթներին, ապա կստացվի, որ նշված մույթների բոլոր

1 Թ. Թորամանյան, Նշվ. աշխ., էջ 6:

քարերն էլ տաշվել և տեղադրվել են միևնույն վարպետի կողմից և նույն վարպետն է, որ աշխատել է բոլոր մուլյթերի վրա և հերթականությամբ բարձրացրել նրանց: Եվ դա բավական չէ, նույն այդ վարպետին է վերագրվում այնպիսի մի հսկայածավալ աշխատանք, ինչպիսին է տաճարի ներսի կորագիծ պատերի բոլոր քարերը տաշելը և տեղում տեղադրելը:

Չժխտելով այն տեսակետը, որ միևնույն հուշարձանում համանման նշանագրեր ունեցող քարերը տաշվել են նույն վարպետի կողմից, մենք վճռականապես դեմ ենք նրանց տեղադրումն էլ նույն այդ վարպետին վերագրելուն, որովհետև անհնար է պատկերացնել, որ մի քանի քար շարելուց հետո վարպետը, առանց ավարտելու իր աշխատանքը մի մուլյթում, դնար մյուս մուլյթը շարելու: Բացի այդ նշանագրեր ունեցող քարերի կողքին անհամեմատ ավելի շատ են այն քարերը, որոնք բնավ չունեն նշանագրեր, իսկ դա ինքնին արդեն ժխտում է այդ հնարավորությունը: Բնականաբար հարց է ծագում՝ ո՞վ է տաշել և ո՞վ է շարել նշանագրեր չունեցող քարերը:

Նշանագրերի բացակայությունն այս քարերի վրա արդեն հիմնովին ժխտում է նրանց ևս նույն այդ աստղաձև նշանագրերն ունեցող վարպետին վերագրելու հնարավորությունը, որովհետև միանգամայն անհասկանալի կմնա, թե ինչու մի քարի վրա նա արել է նշանագիր, իսկ մյուսի վրա՝ ոչ: Եվ եթե, ըստ Թորամանյանի, այդ նշանագրերն են, որ պետք է հիմնական կովան հանդիսանան նրա կատարած աշխատանքի հաշվառման համար, ապա այս դեպքում նրանք բոլորովին կորցնում են իրենց նշանակությունը, որովհետև ոչ մի կերպ հնարավոր չէ տարբերել, թե որտեղ է սկսվում և որտեղ վերջանում աստղաձև նշանագրեր ունեցող վարպետի շարած պատը:

Այս բոլորի հետ միասին, եթե վերհիշենք, որ աստղաձև նշանագրերով քարեր հանդիպում են Ձվարթնոցում ոչ միայն մուլյթերի զոգավոր խորշերում, այլև շատ ուրիշ տեղերում, հիմնականում հատուկենտ քարերի վրա (տաճարի արտաքին պատի և արևմտյան ու արևելյան հատվածներում, տաճարի շուրջը սփռված զանազան բեկորների վրա, ընդ որում հանդիպում են ամենաբազմապիսի տիպի քարեր՝ և՛ զոգավոր, և՛ հարթ տաշած), պարզ կդառնա, որ միևնույն վարպետին վերագրել այս բոլոր քարերի ոչ միայն տաշելը, այլև տեղադրելը՝ կլինի խիստ անտրամաբանական:

Ոչ մի բանի վրա հիմնված չէ Թորամանյանի նաև այն դրույթը, ըստ որի՝ նշված խորշերի և արտաքին շրջանաձև պատերի ներքին երեսների ԲՈՂՈՐ կոր և զոգավոր քարերը տաշվել և շարվել են միևնույն աստղաձև նշանագիրն ունեցող վարպետի կողմից:

Այսպիսի աշխատանք կատարելու համար նրան չէր բավականացի՝ նույնիսկ իր ամբողջ կյանքը, էլ չենք ասում այն, որ ըստ Թորամանյանի, նույն այդ վարպետը դեռևս շատ տեղերում պետք է լինել և մասնակցեր VII դարի հայկական ճարտարապետության համարյա թե բոլոր կառուցվածքների շինարարությանը:

Չի կարելի համաձայնել Թորամանյանի՝ նույն կոնցեպցիայի վրա հիմնված մի այլ դրույթի հետ, ըստ որի սվաստիկաձև նշանագիր ունեցող վարպետն է, որ իրը տաշել և շարել է տաճարի ներսի երեսի բոլոր որմնասյուները իրենց խարխիսներով և խոյակներով: Ճիշտ է, այդ որմնասյուներին պատկանող մի քանի ֆալեթի վրա իրոք հանդիպում է այդ նշանագիրը, սակայն դա դեռևս ոչ մի հիմք չի տալիս մի վարպետի վերագրել այդ հսկայածավալ աշխատանքը:

Բավական է ասել, որ տաճարի ներսում եղել է 64 որմնասյուն, որոնց համարյա թե բոլոր քարերը տաշված են տաճարի լուսամուտների թեթույթուններ կազմող քարերի հետ միասին և ունեն բավականին բարդ կոնֆիգուրացիա: Հաղիվ թե կարիք լինի մեկնարանելու, որ հարյուրավոր այգայիսի բարդ քարերի տաշելն ու շարելը միևնույն վարպետին վերագրելը ոչ միայն չի հիմնավորված, այլև խիստ վեր է մի մարդու ֆիզիկական հնարավորություններից առհասարակ:

Զվիճարկելով Թորամանյանի այն դրույթը, թե հատկապես սվաստիկաձև նշանագիր ունեցող վարպետն է տաշել որմնասյուների քարերի մի մասը (և հատկապես այն քարերը, որոնց վրա հանդիպում է այդ նշանագիրը), մենք դարձյալ դեմ ենք նրանց տեղադրումը ևս նույն այդ վարպետին վերագրելուն, որովհետև նա ստիպված կլիներ մի որմնասյան վրա մի քար դնելուց հետո թողնել իր աշխատանքի վայրը և անցնել մյուս որմնասյանը, և այսպես շարունակ շրջել տաճարի ամբողջ ներքին պարագծով, մի բան, որը ոչ միայն անտրամաբանական է, այլև անհնար:

Այս բոլորից հետո դժվար չէ կռահել, որ Թորամանյանի դրույթները շինարարական աշխատանքների կազմակերպման վերաբերյալ և հատկապես նրա ենթադրությունները՝ կառուցվածքներն առանձին մասերի բաժանած լինելու և ամեն մասի բոլոր հիմնական աշխատանքները (քարերի և տաշելը, և՛ տեղադրելը) միևնույն վարպետին հանձնելու մասին՝ չեն հիմնավորված և չեն կարող ընդունելի համարվել:

Կասկած չի մնում, որ հայկական ճարտարապետության այդ շրջանի կառուցվածքների շինարարական աշխատանքների կազմակերպումը հիմնված է եղել միանգամայն այլ սկզբունքների վրա և, ինչպես կտեսնենք ներքևում, իրականում եղել է շատ ավելի պրոգրեսիվ, քան այդ ենթադրում էր Թորամանյանը:

Այժմ անցնենք Թորամանյանի մյուս դրույթներին:

Ամենից առաջ կանգ առնենք նրա այն տեսակետի վրա, ըստ որի նշանագրերի միջոցով իբր հնարավոր է որոշել տաճարի առանձին մասերից ընկած քարերի սկզբնական տեղերը, մի բան, որ եթե իսկապես այդպես լիներ, մեծապես կլյուրացներ կործանված հուշարձանների վերակառուցման հարցը: Սակայն, ինչպես ցույց են տալիս իրականում պահպանված հուշարձանները, այդ բնավ էլ այդպես չէ: Դժվար չէ տեսնել, որ Թորամանյանի այս եզրակացությունը ամենասերտ կերպով շարկապված էր նրա վերը բերված հիմնական կոնդեպցիային՝ հուշարձանները առանձին մասերի բաժանելու և նրանց ամեն մի մասի քարային բոլոր աշխատանքները մի վարպետի հանձնելու մասին:

Վերը տեսանք, թե ինչքան էր հիմնավորված այդ տեսությունը և կարելի է այստեղ ևս բազմաթիվ օրինակներ բերել՝ ապացուցելու համար, որ համանման նշանագրերի առկայությունը երկու տարբեր քարերի վրա՝ բնավ էլ չի նշանակում, որ դրանք երկուսն էլ սլատկանել են միևնույն ճարտարապետական էլեմենտին:

Թորամանյանն այս կապակցությամբ հիշատակում է Զվարթնոցը, սակայն հենց Զվարթնոցից կարելի է բերել տասնյակ օրինակներ, որոնք հիմնավորապես ժխտում են նրա այդ դրույթը: Անդրադասենք նույն այդ աստղաձև նշանագրի օրինակին: Վերը տեսանք, որ այդ նշանագիրը, բացի մուլթերի

գողացվոր խորշերից, հանդիպում է արտաքին պատի և՛ ներսի, և՛ դրսի երեսներում, հուշարձանի շուրջը թափված հարթ սալերի վրա ու շատ այլ տեղերում: Պարզ է, որ ոչ մի հիմք չկա այս բոլոր քարերը միևնույն կոնստրուկտիվ էլեմենտի առանձին մասերը համարել և այդ հիման վրա այսքան հեռու գնացող եզրակացությունների հանդեմ:

Նշանագրերի ուսումնասիրության հիման վրա Թորամանյանն առաջ է բերում նաև մի այլ հարց. զա հուշարձանների տարեգրման հարցն է, որը, ըստ նրա կարծիքի, հնարավոր է ճշտել հուշարձանների վրա սլահպանված համանման նշանագրերի ուսումնասիրության հիման վրա:

Նշանագրերի համանման ձևերից ելնելով, Թորամանյանը անվերապահորեն ընդունում է, որ Զվարթնոցի նույն սվաստիկաձև նշանագիր ունեցող վարպետն է, որ աշխատել է Թարգմանչաց վանքում, իսկ նրա մյուս ընկերները, որոնք դարձյալ աշխատել են Զվարթնոցում, իրենց ավանդն են մտցրել Գառնահովտի, Թալինի և այլ եկեղեցիների շինարարության գործում:

Նա գրում է.

«...Նշանագրերի փորագրության կերպը և չափերը այնքան նման են Զվարթնոցի նշաններին, որ մարդ իրավամբ հակվում է հավատալ, թե ոչ միայն ժամանակակից են այդ շենքերը, այլև նույն շենքերի մեջ աշխատել են միևնույն վարպետները, միայն քարաաշույնի տարբեր ճյուղի աշխատանքներով»¹:

Զրացառելով նման դեպքերի հնարավորությունը ժամանակագրական տեսակետից մոտ կանգնած հուշարձանների վերաբերյալ, մենք, սակայն, բնավ համաձայն չենք այս գրույթի խիստ ընդհանրացմանը, որովհետև դրա համար չկա և ոչ մի կոնկրետ ապացույց:

Բանն այն է, որ համանման նշաններ հանդիպում են միմյանցից շատ հեռու գտնվող և իրենց թվագրումներով խիստ տարբեր ժամանակներում կառուցված հուշարձաններում: Ավելին. համանման նշանագրեր հանդիպում են և՛ Հայաստանում, և՛ Վրաստանում, և՛ VII դարում, և՛ IX—XI դարերում: Վերցնենք, օրինակ, հնգաթև աստղ ներկայացնող նշանագիրը: Այն հանդիպում է և՛ ուրարտական Իրեբունի քաղաքում (Արինբերդ), և՛ VII դարի սկզբներին կառուցված Դվինում, Պտղնիում, Նոր-Կյանքում, Պեմզաշենում, Գառնահովտում, Զվարթնոցում, Կոշում, Թարգմանչաց վանքում, VII դարի կեսում կառուցված Զորավարում, Թալինի կաթողիկեում, Արուճում, VII դարի վերջում կառուցված Սիսիանում, և՛, վերջապես, Վրաստանում՝ Յրոմիում: Եվ եթե այս նշանի տակ պատկերացնենք միևնույն վարպետին, ապա կստացվի, որ նա շուրջ 100 տարի աշխատել է համարյա թե բոլոր հայկական կառուցվածքներում և դեռ ժամանակ է գտել անցնել Վրաստան, այնտեղ ևս աշխատելու համար: Ինքնին հասկանալի է նման «երկարակեցության» անհնարինությունը և հուշարձանները միայն այդ նշանագրերի հիման վրա տարեգրելու անհիմն լինելը: Պարզ է, որ միևնույն նշանագիրը բնավ չի կարելի վերագրել միևնույն վարպետին: Համանման նշաններ կարող էին ունենալ ինչպես տվյալ վարպետի որդիները, որոնց նա իր արհեստն էր սովորեցնում և իր հետ տանում տարբեր տեղեր (սրանք էլ հասուն մարդ դառնալով, շրջում էին իրենց որդիների հետ), և նմանապես միմյանց հետ որևէ առնչություն չունեցող տարբեր վարպետներ, լինեն դրանք Հայաստանում, Վրաստանում կամ այլուր:

¹ Թ. Թորամանյան, նշվ. աշխ., էջ 6:

Բացի այդ, չի կարելի աչքաթող անել նաև հետևյալ հանդամանքը: Շատ հաճախ նույն նշանագիրը տարբեր հուշարձաններում հանդիպում է միանգամայն տարբեր բնույթի քարերի վրա, և եթե մի տեղ նա հանդիպում է միայն բարդ կոնֆիգուրացիա ունեցող, կորագիծ քարերի վրա, մի այլ հուշարձանում տեսնում ենք նրան փորագրված արդեն հարթ, ամենապարզ տիպի քարերի վրա: Անշուշտ այստեղ կարող է հարց առաջանալ, թե ինչու՞ եթե նույն վարպետը կարող էր տաշել այսպիսի բարդ, մեծ վարպետություն պահանջող քարեր, ապա ավելի ուշ շրջանում կառուցված մի հուշարձանում նա աշխատել է շատ ավելի պրիմիտիվ, և այստեղից էլ՝ շատ ավելի պակաս աշխատավարձ ապահովող բնագավառում: Թորամանյանի աչքից չի վրիպել այս հանգամանքը: Սակայն նա նշում է միայն, որ նույն վարպետը տարբեր հուշարձաններում աշխատել է «...քարտաշության տարբեր ճյուղերի աշխատանքներով», և չի տալիս այդ երևույթի մեկնաբանությունը, մի բան, որը ինչպես տեսանք վերը, ոչ մի բանով չէր կարելի հիմնավորել: Կասկած չկա, որ այսպիսի դեպքերում տարբեր հուշարձաններում աշխատել են տարբեր մարդիկ, որոնք իրականում ոչ մի առնչություն չեն ունեցել միմյանց հետ:

Նշենելով բերված դրույթներից, կարելի է հանգել հետևյալ հիմնական եզրակացություններին:

Միջնադարյան Հայաստանում շինարարությունը կատարվում էր դործակալների միջոցով, որոնք և աշխատանքի էին հրավիրում որակյալ վարպետների առանձին խմբեր:

Այս հիմնական խմբի մեջ մտնող վարպետների աշխատանքը ամենայն հավանականությամբ հաշվի էր առնվում նույն դործակալի մոտ աշխատող վերակացու-ոստիկանների կողմից և այդ պատճառով էլ վարպետները ստիպված չէին իրենց ամեն մի տաշած քարի վրա հատուկ նշանագրեր փորագրել:

Ինչպես կարելի է եզրակացնել վերը բերված նյութերից, բացի արհեստավորների այսպիսի խմբերից, կային նաև շրջիկ արհեստավորներ, որոնք չէին մտնում որևէ գործակալի խմբի մեջ, այլ շրջում էին երկրովը մեկ, հարմար աշխատանք գտնելու նպատակով: Մեր կարծիքով, քարերի վրա եղած նշանագրերն էլ պատկանում են հենց այդպիսի շրջիկ քարտաշներին, որոնք նման ձևով առանձնացնում էին իրենց աշխատանքը նույն շինարարության վրա աշխատող, հիմնական խմբի մեջ մտնող քարտաշների աշխատանքից: Ահա հենց այդ է պատճառը, որ նշանագրեր ունեցող քարերի քանակը այնքան չնչին է, համեմատած նշանագրեր չունեցող քարերի հետ: Եվ որովհետև որմնադիրների աշխատանքը անջատված էր քարտաշների աշխատանքից, «քարակիրները» քար էին մատակարարում որմնագիրներին՝ առանց որևէ տարբերություն դնելու, թե ո՞ր վարպետի տաշած քարն է այդ, միայն թե քարը ոստիկանի կողմից արդեն ընդունված լիներ և իր չափերով համապատասխաներ պահանջված տեղին: Ահա այդ պատճառով էլ չպետք է վարմանալ, որ այսօր հուշարձանների պատերի մեջ տեսնում ենք միմյանց կողքին դասավորված և՛ տարբեր նշանագրեր ունեցող, և՛ առանց որևէ նշանագրի քարեր, թեև բոլորն էլ տաշված են հենց այն կոնստրուկտիվ էլեմենտի համար, որտեղ նրանք զրված են այժմ:

Այս ամենի հետ մեկտեղ պետք է նշել նաև, որ որոշ, եզակի դեպքերում միևնույն նշանագիրը հանդիպում է հուշարձանի և՛ ներքևի մասում, և՛ միջին բարձրության վրա, և՛ էլ ավելի բարձր տեղերում: Այսպիսի դեպքերում պարզ է,

որ հնարավոր չէ վերագրել նրանց շրջիկ վարպետներին, որովհետև տաճարների շինարարության միջին տևողությունը կազմում էր մոտավորապես 5—6 տարի:

Մեր կարծիքով այսպիսի նշանագրեր կարող էին թողած լինել այն վարպետները, որոնք թեև մշտապես աշխատել են շինարարության վրա, սակայն չեն մտել գործակալի հիմնական խմբի մեջ, և անմիջական ծառայության մեջ են եղել հուշարձանի կոիտորի մոտ:

Իրավացիորեն հարց կարող է առաջանալ, իսկ ինչու՞ գործակալի մոտ աշխատող հիմնական խմբի մեջ մտնող վարպետների տաշած քարերի վրա չկան նշանագրեր և ի՞նչպես էր վճարվում նրանց հասանելիք աշխատավարձը:

Վերը տեսանք, որ շրջիկ վարպետների աշխատանքի հաշվառումը կատարվում էր ըստ նշանագրերի, և դժվար չէ եզրակացնել, որ աշխատավարձի վճարումն էլ կատարվում էր պարզ գործավարձային սխեմայի համաձայն, ընդ որում աշխատավարձի չափը ուղղակի պայմանավորված էր արտադրանքի քանակությամբ:

Միանգամայն այլ պայմանների մեջ էրն գտնվում հիմնական խմբի մեջ մտնող վարպետները, որոնք նախնական համաձայնության էին դալիս գործակալի հետ և անշուշտ, պետք է ունենային օրավարձի մի ինչ-որ որոշակի չափ:

Ամենայն հավանականությամբ Հայաստանում էս, ինչպես և հարևան Փոքր Ասիայում, օգտագործվում էր աշխատանքի այն սխեման, ինչ որ հիշատակվում է վերը բերված Գրիգոր Նյուացու նամակի մեջ: Այդ նամակից պարզ է պահանջ, որ գործավորներին աշխատավարձը վճարվում էր օրավարձով, թեև նրանք ունեին աշխատանքի որոշակի նորմաներ, որոնց կատարումը պարտադիր էր համարվում: Բացի դրանից, վարպետներն անմիջական նյութական պատասխանատվություն էին կրում և՛ գործատիրոջ կողմից տրված աշխատանքի նպատակահարմար օգտագործման¹, և՛ թե նույն գործատիրոջ կոիտորի սեփականությունը հանդիսացող գործիքների անվնասության համար²:

Ինչպես տեսանք, գործավորների անմիջական ղեկավարն էր ոստիկանը, որն էլ, ամենայն հավանականությամբ, հետևում էր վարպետների աշխատանքին և հաշվի առնում նրանցից յուրաքանչյուրի արտադրանքը: Պարզ է, որ ոչ մի անհրաժեշտություն չկար ամեն մի քարի վրա նշանագրեր փորագրել, ըստ որում նշանագրերի առկայությունը կարող էր օգնել տաշած քարերի հաշվառումը դյուրացնելու գործին միայն, մինչդեռ որմնադիրների կատարած աշխատանքի հաշվառման համար նշված մեթոդն արդեն անհնար կլիներ օդոագործել թեկուզ հենց այն պատճառով, որ բոլոր քարերի վրա մինչ այդ արդեն նշանագրեր կլինեին փորագրված: Այստեղից դժվար չէ եզրակացնել, թե ինչու առհասարակ հիմնական խմբի մեջ մտնող վարպետների և՛ տաշած, և՛ տեղագրած քարերի վրա չկա և ոչ մի նշանագիր: Շրջիկ քարտաշների տաշած քարերն են միայն, որ ունեն իրենց նշանագրերը:

Մյուս կողմից, նշանագրերի ուսումնասիրությունը ցույց է տալիս, որ եթե մի որևէ քարտաշ ավելի հմուտ էր, օրինակ՝ կորագիծ քարեր տաշելու մեջ, ապա նրան էլ հանձնարարվում էր պատրաստել այդ քարերը: Դրա հետևանքով էլ

¹ Վ. Բաստամյանց, *նշվ.*, աշխ., էջ 436:

² Նույն տեղում, էջ 437:

տարբեր կոնստրուկտիվ էլեմենտներում կարելի է տեսնել համանման նշանագրեր ունեցող քարերի ոչ մեծ խմբեր (4—6 հատ), դասավորված միմյանց կողքի, թեև հենց նրանց կից արդեն կան և առարբեր նշանագրեր ունեցող, և հատկապես առանց նշանագրերի բազմաթիվ քարեր:

Այստեղից ակնհայտ է դառնում, որ որմնադիրների աշխատանքը, որն առավել պատասխանատու էր, անջատված էր քարտաշների աշխատանքից:

Աշխատանքի կազմակերպման այս ձևը, անշուշտ, շատ ավելի պրոգրեսիվ էր, քան այն, ինչ որ նշվել էր Սիրիայի և Պարսկաստանի համար: Աշխատանքի կազմակերպման հիշյալ մեթոդի ժամանակ հնարավոր էր շատ ավելի լավ հետևել կառուցվածքի որակին, որովհետև որմնադիրները, որոնք անջատված էին քարտաշներից և պատասխանատու իրենց շարած պատի որակի համար, քարտաշներից կապահանջեին բարձրորակ քարեր, մինչդեռ այն վարպետը, որը պետք է և՛ տաշեր, և՛ շարեր, առանց որևէ դժվարության պատի շարքի մեջ կարող էր թաքցնել տաշված քարի որոշ թերությունները:

Նշված գրույթների հետ լիովին համապատասխան է նաև այն փաստը, որ առանձին, իրենց ծավալով ոչ մեծ հուշարձաններում նշանագրեր կամ բոլորովին չկան, կամ հանդիպում են շատ փոքր քանակությամբ: Սա նշանակում է, որ այդպիսի կառուցվածքները ամենայն հավանականությամբ սկզբից մինչև վերջ կառուցվել են որևէ գործակալի խմբի կողմից, և շրջիկ վարպետների մասնակցությունն այստեղ եղել է շատ աննշան:

Մի կողմ թողնելով այսուրեքի տառերը պատկերող նշանագրերը (որոնցում ամենայն հավանականությամբ սկսվում էին վարպետների անունները), կանգ առնենք առանձին գծիկներից կազմված նշանագրերի վրա:

Գծիկներից կազմված նշանագրերի ուսումնասիրությունը ցույց է տալիս, որ առավել պարզ նշանագրերը երկու գծիկով կազմվածներն են: Դժվար չէ նկատել, որ այստեղ առկա են առհասարակ այն բոլոր դեպքերը, որոնք հնարավոր է ստանալ երկու գծիկների միջոցով: Համարյա թե նույն բանը կարելի է ասել նաև երեք գծիկներից կազմված նշանագրերի մասին: Չորս և հինգ գծիկներ ունեցող նշանագրերի յուրահատուկ կողմն արդեն հանդիսանում է որոշակի պարփակ և տպավորվող նշանագրերի ստեղծումը: Ինչ վերաբերում է 6—8 գծիկներից կազմված նշանագրերին, ապա նրանք հանդիպում են խիստ հազվադեպ, և, անշուշտ, մշակված են եղել այն հաշվով, որ չկրկնեն տվյալ շինարարության վրա արդեն օգտագործվող նշանագրերը:

Որ նշանագրերը նպատակ ունեին միայն դյուրացնել շրջիկ վարպետների կողմից տաշված քարերի հաշվառման գործը, պարզ է դառնում հուշարձանների պատերի վրա նրանց ունեցած բոլորովին պատահական դասավորությունից, և այդ տեսակետից ուսումնասիրվող նշանագրերը բնավ չի կարելի շփոթել միջնադարյան արհեստավորների անհատական գրոշմների հետ, որոնք դրվում էին առանձին իրերի վրա, ցույց տալու համար նրանց պատրաստման վայրը:

Քարտաշ վարպետին անհրաժեշտ էր որևէ կերպ նշել իր կատարած աշխատանքը և նրա համար բնավ որևէ նշանակություն չուներ, թե շինքի որ մասում կգրվեն իր տաշած քարերը: Ահա այդ է պատճառը, որ ալբուրենի տառերի հետ միասին նկատում ենք առավել սլարգ էրկրայափական նշանագրերի օգտագործումը, որոնք և՛ կարող էին անցնել սերնդից-սերունդ, և՛ նորից հորինվել ամեն մի նոր շինարարության ժամանակ, խուսափելու համար համանման նշանների օգտագործումից, քանի որ տվյալ շինարարության վրա

կայսրը էին հանդիպել մեկից ավելի շոքեկ քաբուաշնիք, որոնք ունենալին նույն նշանագրերը:

Այն հանգամանքը, որ նշանագրերում մեզ հանդիպում են զգալի քանակությամբ հայկական այբուբենի տառեր, ընդ որում դրանք բոլորն էլ լավ գծագրված են և իրենց կատարման որակով բնավ ետ չեն մնում նույն դարաշրջանի սարձանադրությունների մեջ օգտագործվող տառերից, որոշ հիմքեր է տալիս ասելու, որ հին Հայաստանում, նույնիսկ հասարակ ժողովրդի մեջ, սովորական քարտաշների շրջանում զգալի էր գրագետների տոկոսը: Ինքնին հասկանալի է, որ անգրագետ քարտաշը որպես նշանագիր չէր ընտրի այբուբենի որևէ տառը, և անշուշտ, կգերապասեր գծիկներից կազմվածը:

Մյուս կողմից, այն բանը, որ նշանագրերում հանդիպում են միայն հայկական այբուբենի տառեր, վկայում է ինչպես VII դարի հայկական հուշարձանները կառուցող վարպետների ազգային պատկանելիության, այնպես էլ ուրիշ երկրներից վարպետներ հրավիրելու սովորության բացակայության մասին: Դրա հետ մեկտեղ, այն փաստը, որ հայկական այբուբենի տառերով նշանագրեր հանդիպում են նաև Հայաստանի սահմաններից դուրս (Վրաստան, Ադվանք) ինքնին արդեն վկայում է հայ վարպետների շինարարական գործունեության մասին նաև հարևան երկրներում:

* * *

Նշանագրերի ուսումնասիրությունը հնարավորություն է տալիս բարձրացնելու վաղ միջնադարի արհեստներին վերաբերող ևս մի հարց: Բանն այն է, որ առավել հնագույն կառուցվածքներում (Քասաղ, Երերուլք և V դարի այլ բազիլիկ կառուցվածքներ) նշանագրեր համարյա թե չկան, կամ հանդիպում են ամբողջ շենքում ընդամենը 2—3 հատ, մինչդեռ VII դարի հուշարձաններում նրանց քանակը հասնում է մի քանի տասնյակի: Այս հանգամանքը անշուշտ պատահական չէր կարող լինել և ամենասերտ կերպով պետք է որ կապված լիներ շինարարական գործի կազմակերպման մեջ տեղի ունեցած փոփոխությունների հետ:

Հայ ժողովրդի III—IV դարերի պատմության մեջ խիստ ուշագրավ է IV դարի կեսերից սկսված այն պայթյալը, որն ընթանում էր մի կողմից կենտրոնախոյս նախարարների, մյուս կողմից՝ կենտրոնական իշխանության միջև: Կենտրոնական իշխանության հիմնական հենարաններն էին քաղաքները և քաղաքային համայնքները, որոնց կործանումը 364—368 թթ. պարսկական արշավանքների ժամանակ նախադրյալներ ստեղծեց կենտրոնական իշխանության վերացման և երկրի առանձին մասերի սահմանափակության ու մասնատվածության էլ ավելի ուժեղացման համար:

387 թ. Հայաստանի բաժանումը ավելի ևս ամրապնդեց երկրի ֆեոդալական մասնատվածությունը: Նախարարական տների սահմանազատումը լիովին բխում էր Հայաստանի մեծ մասը գրաված Պարսկաստանի շահերից, և բնավ պատահական չէ, որ պարսիկները հենց սկզբից էլ օրինականացրին նախարարների ժառանգական իրավունքները, և նախարարական աները դարձան ինքնավար և կիսանկախ, ունեին իրենց զորքը, իրենց եպիսկոպոսությունները, տոհմային զինանշանները և այլն:

Երկրի այսպիսի մասնատվածությունը չէր կարող իր ազդեցությունը չունենալ արհեստների և ճարտարապետության զարգացման վրա: Բնական է,

որ յուրաքանչյուր նախարարական տուն իր տերիտորիայում կատարվող շինարարությունը պետք է ձգտեր կատարել իր միջոցներով, իր վարպետների, իր աշխատավորների ձեռքերով: Ահա այս իրադրությունն էլ իր որոշակի կնիքն է թողել նաև IV—V դարերի շենքերի, բաղնիքի կառուցվածքների վրա, որոնց պատերին համարյա թե իսպառ բացակայում են քարտաշ վարպետների նշանները, և եթե հանդիպում էլ են, ապա նրանց քանակությունը շատ չնչին, աննշան տոկոս է կազմում նշանագրեր շունեցող քարերի քանակության համեմատությամբ:

Այս հանգամանքը, անշուշտ, պատահական չէ և, մեր կարծիքով, վկայում է շրջիկ վարպետների բացակայության մասին, մի բան, որը լիովին համապատասխանում էր երկրի տնտեսական-քաղաքական իրադրությանը, երբ ինքնամփոփ ու սահմանափակ նախարարական տների առկայությունը ոչ մի նախադրյալ չէր ստեղծում ազատ կերպով շրջող արհեստավորների գոյության համար:

Սակայն հայ ժողովրդի համառ պայքարը օտար բռնապետության լծից ազատագրվելու ուղղությամբ, 450—451 և 481—484 թթ. ազատագրական ապստամբությունները որոշակի արդյունքների հասան, և պարսկական գերշխանությունը փաստորեն դարձավ նոմինալ: Սկսվեց խաղաղ զարգացման մի շրջան, որը շարունակվեց մինչև VI դարի կեսը: Զարգացան քաղաքները, հատկապես Ղվինը, որը երկրի արհեստագործական արտադրության գլխավոր կենտրոնն էր:

Առևտրի զարգացումը, Հայաստանի մասնակցությունը միջազգային առևտրին՝ զգալիորեն նվազեցրին երկրի առանձին մասերի մասնավաճառությունը: Քաղաքական իրադրության զարգացումն իր հերթին նույնպես խոշոր չափով թուլացրեց առանձին նախարարական տների ինքնամփոփ վիճակը: Այս հանգամանքը հատկապես նկատելի է Արևմտյան Հայաստանում, որտեղ բյուզանդական կայսրությունն անում էր ամեն ինչ՝ Հայաստանը կայսրության մի սովորական մարզը դարձնելու համար:

Նույնանման պատկեր տեսնում ենք նաև Արևելյան Հայաստանում, ուր պարսից խոսքով Առաջին Անուշիրվանի (531—578) ռազմա-վարչական ռեֆորմները դարձյալ ուժեղ հարված էին նախարարական տների սահմանափակվածությանը: Մյուս կողմից, այն հանգամանքը, որ հարկահավաքությունը այժմ կատարվում էր ոչ թե բնամթերքով, այլ դրամով, ուժեղացրեց գյուղական համայնքի քաջքայման պրոցեսը և զգալիորեն ավելացավ գրամ վաստակելու նպատակով դեպի քաղաք ձգտող գյուղացիների թիվը:

Այս ամենը, անշուշտ, բարենպաստ պայմաններ էր ստեղծում արհեստների հետագա զարգացման համար, և միանգամայն տրամաբանական է, որ հարմար աշխատանք որոնելու նպատակով արհեստավորները կարող էին շրջել քաղաքից-քաղաք, երկրի մի մասից մյուսը, ընդ որում, այս տեսակետից, առանձնահատուկ պայմանների մեջ էին գտնվում քարտաշները, որոնք իրենց մասնագիտության սպեցիֆիկ կողմերից ելնելով, արդեն չէին կարող մշտապես կապված լինել միևնույն աշխարհագրական վայրի հետ և պետք է մեկնեին այնտեղ, որտեղ որ ձեռնարկվում էր որևէ նշանակալից շինարարություն: Ահա այս հանգամանքն էլ, անշուշտ, իր որոշակի դրսևորումն է գտել շինարարական աշխատանքների կազմակերպման դրոշմով, և այդ պրոցեսի մի ակնհայտ արտահայտությունն էլ, մեր կարծիքով, հանդիսանում է նշանագրերի քանակության խիստ աճը, որը նկատվում է VI—VII դարերի հուշարձաններում:

* * *

Վերը բերված նյութերի հիման վրա կարելի է հանդել հետևյալ եզրակացությունների.

1. Միջնադարյան Հայաստանում կուլտային կառուցվածքների շինարարության նկատմամբ սահմանված է եղել մի որոշակի վերահսկողություն: Եկեղեցական իշխանությունների կողմից հաստատման ենթակա էին ոչ միայն եկեղեցիների, վկայարանների տեղաբաշխման, այնտեղ տեղադրվող մասունքների վավերականության հարցերը, այլև ապագա կառուցվածքների ընդհանուր ճարտարապետական ձևերը:

2. Շինարարությունը կատարվում էր գործակալների միջոցով, որոնք և անմիջական բանակցություններ էին վարում տարբեր մասնագիտության վարպետների խմբերի հետ: Առանձին դեպքերում, որպես գործակալներ, հանդես էին գալիս իրենք՝ ճարտարապետները:

3. Շինարարական աշխատանքների ընդհանուր ղեկավարությունը իրականացնում էր ճարտարապետը: Նախքան աշխատանքները սկսելը նա պատրաստում էր կառուցվածքի մոդելը: Աշխատանքներն սկսելուց առաջ ճարտարապետը լարի միջոցով նշվարկում էր կառուցվածքի չափերը, իսկ հետագայում, արդեն քարային աշխատանքների ժամանակ, քանոնի և ինչ-որ սուր գործիքի միջոցով նշվարկում բոլոր կոնստրուկտիվ հանգույցները, զարգաքանդակների, խոյակների, խորիսխների և այլ մանրամասների տեղերը:

4. Գործակալին անմիջականորեն ենթարկվում էին ոստիկանները, որոնք հետևում էին շինանյութերի ծախսմանը և ընդունում վարպետների կատարած աշխատանքը:

5. Շինարարական բոլոր հիմնական աշխատանքները կատարվում էին «ղտսերի» բաժանված վարպետների կողմից: Ամենայն հավանականությամբ գոյություն ունեին քարտաշների, որմնադիրների և շաղախ պատրաստողների «ղասեր»: Բացառված չէ, որ առանձին «ղաս» կազմեին նաև փոխադրական աշխատանք կատարող «անարուեստ գործատուները»:

6. «Պասերը» ղեկավարում էին տվյալ մասնագիտության առավել որակյալ վարպետները, որոնք հետևում էին աշխատանքների որակին և ճարտարապետի ցուցմունքների համաձայն՝ պատրաստում առավել բարդ կոնֆիգուրացիա ունեցող քարերի նախօրինակները, որոնց հիման վրա արդեն մյուս քարտաշները պատրաստում էին շինարարության մեջ օգտագործվելիք քարերը:

7. Շինարարության վրա, բացի գործակալի հիմնական խմբի մեջ մտնող վարպետներից, աշխատում էին նաև շրջիկ վարպետներ, որոնք կարող էին ընդունվել և արձակվել եղած պահանջի համաձայն: Բացի շրջիկ վարպետներից շինարարության վրա աշխատում էին նաև այնպիսիները, որոնք չմտնելով գործակալի կողմից հավաքագրած հիմնական խմբի մեջ, ծառայում էին կտիտորի մոտ: Բացառված չէ, որ նշանագրերի մի մասը պատկանում է հենց այս կարգի վարպետներին: Գործակալի հիմնական խմբի մեջ չմտնող վարպետներին աշխատավարձ վճարվում էր նրանց տաշած քարերի քանակին համապատասխան, և նրանց կատարած աշխատանքը հաշվի էր առնվում առանձին: Այդ է պատճառը, որ նրանք իրենց տաշած քարերի վրա դնում էին հատուկ նշանագրեր:


8. Գործակալի մոտ աշխատող հիմնական խմբի մեջ մտնող վարպետներին աշխատավարձը վճարվում էր օրավարձային սխեմայով, թեև նրանք ունեին իրենց որոշակի աշխատանքային նորմաները և նյութական պատասխանատվություն էին կրում թե՛ շինանյութերի նպատակահարմար օգտագործման, և թե՛ գործատիրոջ գործիքների անվնասության համար: Այս խմբի մեջ մտնող և՛ քարտաշների, և՛ որմնագիրների աշխատանքը հաշվի էր առնվում ոստիկանների կողմից, և հենց այդ պատճառով էլ վարպետները ստիպված չէին ամեն մի քարի վրա նշանագիր փորագրել:

9. Քարտաշների աշխատանքը լիովին անջատված էր որմնագիրների աշխատանքից: Վերջիններիս քար էին մատակարարում հատուկ «քարկիրները» առանց որևէ տարրերով լինելու, թե տվյալ քարը տաշված է հիմնական խմբի մեջ մտնող վարպետի, թե այդ խմբի մեջ չմտնող վարպետի կողմից, միայն թե քարն ունենար համապատասխան չափեր և ընդունված լիներ ոստիկանի կողմից: Այստեղից էլ նշանագրերի այն պատահական դասավորությունը, որը նկատվում է այդ շրջանի բոլոր հուշարձաններում անխտիր:

10. IV—V դարերում կառուցված հուշարձաններում նշանագրերի խիստ սակավթիվ լինելը և, ընդհակառակը, նրանց քանակության զգալի աճը VI—VII դարերի հուշարձաններում, ամենասերտ կերպով կապված են V դարի վերջից երկրում սկսված սոցիալ-տնտեսական տեղաշարժերի հետ ընդհանրապես և նույն այդ շրջանում արհեստների զարգացման մեջ նկատվող մի նոր աստիճանի հետ՝ մասնավորապես:

VI—VII դարերի նշանագրեր






№ 1 — Պտղնի, Պեմդաշեն, Մալխյան, Զվարթնոց, Արամու, Արուճ,
 Գառնահովիտ, Սիսիան, Թալին (փոքր), Թալին (կաթողիկե), Ցրոմի (Վրաս-
 տան): № 2 — Պտղնի, Արամու, Զվարթնոց, Թալին (կաթողիկե), Գառնահովիտ:
 № 3 — Պտղնի, Արամու, Գալանե, Զվարթնոց, Պեմդաշեն, Գառնահովիտ,
 Թալին (փոքր), Թալին (կաթողիկե), Սիսիան: № 4 — Գալանե, Զվարթնոց, Մա-
 լխյան, Թալին (փոքր), Սիսիան: № 5 — Պտղնի, Արամու, Գառնահովիտ, Սի-
 սիան: № 6 — Արամու, Գալանե, Զվարթնոց, Իրինդ, Թալին (կաթողիկե):
 № 7 — Պտղնի: № 8 — Գալանե, Սիսիան: № 9 — Զվարթնոց: № 10 — Թալին (կաթո-
 ղիկե): № 11 — Զվարթնոց, Գառնահովիտ: № 12 — Պտղնի, Զվարթնոց:
 № 13 — Զվարթնոց: № 14 — Զվարթնոց: № 15 — Զվարթնոց: № 16 — Պտղնի:
 № 17 — Արուճ, Գառնահովիտ: № 18 — Պտղնի, Դվին, Զորավար, Պեմդաշեն, Մա-
 լխյան, Իրինդ, Գառնահովիտ, Սիսիան, Արուճ: № 19 — Գալանե: № 20 — Զվարթ-
 նոց: № 21 — Դվին: № 22 — Կոշ: № 23 — Զվարթնոց: № 24 — Դվին: № 25 — Գա-
 լանե: № 26 — Գառնահովիտ: № 27 — Գառնահովիտ: № 28 — Պտղնի, Արուճ,
 Ցրոմի (Վրաստան): № 29 — Մալխյան: № 30 — Պտղնի: № 31 — Դվին, Արամու,
 Թալին (փոքր), Թալին (կաթողիկե), Սիսիան: № 32 — Պտղնի, Զվարթնոց, Թա-
 լին (փոքր), Մալխյան, Իրինդ, Գառնահովիտ, Զվարի (Վրաստան), Ցրոմի
 (Վրաստան): № 33 — Արամու, Գառնահովիտ: № 34 — Զվարթնոց: № 35 — Արա-
 մու, Գալանե, Գառնահովիտ: № 36 — Արամու: № 37 — Զվարթնոց: № 38 —
 Պտղնի, Թալին (փոքր), Սիսիան: № 39 — Գառնահովիտ: № 40 — Գառնահովիտ:

№ 41—Սիսիան: № 42—Զվարթնոց, Թալին (փոքր), Գառնահովիտ: № 43—Զվարթնոց: № 44—Պտղնի, Արամուս, Սիսիան, Զվարթնոց, Պեմզաշեն, Գայանե, Արուճ, Թարգմանչաց, Յրոմի (Վրաստան): № 45—Պտղնի, Արամուս, Զվարթնոց, Գայանե, Պեմզաշեն, Թարգմանչաց, Կոշ, Զորավար, Թալին (կաթողիկե), Գառնահովիտ, Սիսիան, Արուճ, Նոր Կյանք, Յրոմի (Վրաստան): № 46—Թալին (փոքր): № 47—Սիսիան: № 48—Պտղնի, Գայանե, Զվարթնոց, Պեմզաշեն, Թալին (փոքր), Գառնահովիտ, Սիսիան, Յրոմի (Վրաստան): № 49—Արուճ: № 50—Մայիսյան: № 51—Պտղնի, Գայանե, Զվարթնոց, Նոր Կյանք, Արուճ: № 52—Պտղնի: № 53—Գառնահովիտ: № 54—Արամուս: № 55—Գայանե: № 56—Գառնահովիտ: № 57—Թարգմանչաց, Սիսիան: № 58—Գառնահովիտ, Սիսիան: № 59—Գառնահովիտ: № 60—Թալին (կաթողիկե): № 61—Իրինդ: № 62—Իրինդ: № 63—Արուճ: № 64—Արուճ, Թալին (կաթողիկե): № 65—Արուճ, Սիսիան: № 66—Պտղնի, Դվին, Արուճ: № 67—Դվին: № 68—Պտղնի: № 69—Թարգմանչաց: № 70—Պտղնի: № 71—Պտղնի: № 72—Պտղնի: № 73—Պտղնի: № 74—Պտղնի: № 75—Պտղնի: № 76—Գառնահովիտ: № 77—Դվին, Կոշ, Զվարթնոց, Պեմզաշեն, Թալին (փոքր), Թալին (կաթողիկե), Սիսիան: № 78—Զվարթնոց, Մայիսյան, Զորավար: № 79—Պտղնի, Գայանե, Զվարթնոց, Թալին (կաթողիկե), Սիսիան: № 80—Պտղնի, Արամուս, Զվարթնոց: № 81—Զվարթնոց, № 82—Սիսիան: № 83—Պտղնի, Սիսիան: № 84—Զվարթնոց, Պեմզաշեն, Թալին (կաթողիկե): № 85—Պտղնի, Թալին (փոքր), Թալին (կաթողիկե), Սիսիան: № 86—Զորավար, Սիսիան: № 87—Սիսիան: № 88—Պտղնի: № 89—Պտղնի, Գայանե, Պեմզաշեն, Սիսիան: № 90—Պեմզաշեն: № 91—Գայանե: № 92—Պեմզաշեն, Թալին (կաթողիկե), Սիսիան: № 93—Մայիսյան, Պեմզաշեն: № 94—Կոշ, Զորավար, Գառնահովիտ: № 95—Պեմզաշեն: № 96—Պեմզաշեն, Գառնահովիտ: № 97—Պտղնի: № 98—Գառնահովիտ, Պեմզաշեն: № 99—Թալին (փոքր): № 100—Թալին (կաթողիկե): № 101—Գառնահովիտ, Սիսիան: № 102—Արուճ: № 103—Գայանե: № 104—Պտղնի, Պեմզաշեն, Գառնահովիտ, Կոշ, Մայիսյան, Թալին (փոքր), Թալին (կաթողիկե), Սիսիան: № 105—Գառնահովիտ: № 106—Գառնահովիտ: № 107—Սիսիան: № 108—Սիսիան: № 109—Սիսիան: № 110—Սիսիան: № 111—Սիսիան: № 112—Սիսիան:

IX դարի վերջի և X դարի սկզբի նշանագրեր



№ 1—Շողագավանք: № 2—Շողագավանք: № 3—Շողագավանք. № 4—Շողագավանք, Կոթավանք, Մաքենյաց վանք, Բյուրական: № 5—Շողագավանք, Կոթավանք, Քոլատակի ս. Աստվածածին, Մաքենյաց վանք: № 6—Շողագավանք, Կոթավանք, Մաքենյաց վանք, Տաթև, Բյուրական: № 7—Շողագավանք, Քոլատակի ս. Աստվածածին, Մաքենյաց վանք, Բյուրական: № 8—Կոթավանք: № 9—Կոթավանք, Մաքենյաց վանք, Տաթև: № 10—Կոթավանք: № 11—Կոթավանք: № 12—Քոլատակի ս. Աստվածածին: № 13—Քոլատակի ս. Աստվածածին: № 14—Մաքենյաց վանք: № 15—Մաքենյաց վանք: № 16—Մաքենյաց վանք: № 15—Մաքենյաց վանք: № 16—Մաքենյաց վանք: № 17—Մաքենյաց վանք: № 18—Մաքենյաց վանք, Տաթև: № 19—Կոթավանք: № 20—Մաքենյաց վանք: № 21—Մաքենյաց վանք: № 22—Մաքենյաց վանք: № 23—Մաքենյաց վանք: № 24—Տաթև: № 25—Տաթև: № 26—Տաթև: № 27—Տաթև, Բյուրական: № 28—Տաթև, Բյուրական: № 29 Տաթև: № 30—Տաթև: № 31—Տաթև: № 32—Տաթև և № 33—Տաթև:

НЕКОТОРЫЕ ВОПРОСЫ ОРГАНИЗАЦИИ СТРОИТЕЛЬНОГО ДЕЛА СРЕДНЕВЕКОВОЙ АРМЕНИИ И ЗНАКИ МАСТЕРОВ-КАМЕНОТЕСОВ

Ст. Х. МНАЦАКАНЯН

(Р е з ю м е)

Вопросы, связанные со строительной техникой и, в особенности, с организацией строительного дела в средневековой Армении, изучены очень мало. Сравнительное изучение сохранившихся исторических материалов и знаков мастеров-строителей на памятниках зодчества приводит к следующим выводам:

1. В средневековой Армении существовал определенный надзор за строительством культовых зданий, осуществлявшийся церковными властями.

2. Строительство велось с помощью горцакалов (приказчиков), которые вели переговоры с мастерами разных специальностей.

3. Общее руководство строительством принадлежало зодчему, который изготовлял модель будущего здания.

4. Горцакалу подчинялись надзиратели (востиканы), следившие за расходом строительных материалов и принимавшие выполненную мастерами работу.

5. Все основные строительные работы велись мастерами, которые делились на группы («дасы») — каменотесов, каменщиков-кладчиков и изготовителей раствора.

6. «Дасами» руководили опытные мастера данной специальности.

7. На строительстве работали и странствующие мастера. Они не входили в основную группу и нанимались и увольнялись по мере надобности. Не входили в основную группу и мастера, служившие у ктитора. Возможно, что часть сохранившихся на памятниках знаков принадле-

жит последним. Они получали заработную плату отдельно от мастеров основной группы, по числу сработанных камней, поэтому ставили на них свои знаки.

8. Работавшие у горцакала мастера получали плату поденно, хотя имели определенные нормы выработки. Их работа учитывалась востиканами, и поэтому они не ставили свои знаки на каждом сработанном камне.

9. Работа каменотесов была отделена от работы кладчиков. Последние получали сработанные камни через носильщиков («каркиры»). Они подавали камни независимо от того, какими мастерами они сработаны, чем и объясняется случайное расположение знаков на памятниках.

10. Очень ограниченное количество камней со знаками мастеров в IV—V веках и обилие их в VI—VII веках объясняется социально-экономическими сдвигами, которые наблюдались в стране с конца V века, и развитием в этот период ремесел.